

牧菴集

一



牧菴集
三十六卷

四部叢刊初編集部

上海商務印書館縮
印武英殿聚珍板本

牧庵集序

文章有一代之宗工其出也秉山川之靈闢天地之運所謂百年幾見者也漢四百年惟司馬遷父子揚雄班固四人兩晉魏隋之間則無聞矣唐三百年惟韓愈柳宗元二人宋三百年惟歐陽修蘇軾二人當是時非無作者雜出其間與三四君子相與度長而挈大並駕而齊驅焉然皆撮拾剽竊不能成一家之言負當代宗工之任此山川之氣天地之運誠有時而或息卽我朝國初最號多賢而文章衆稱一代之宗工者惟牧庵姚公一人耳公營州柳城人營州之族好馳馬試劍遊畋爲樂公獨嗜學績文早負奇氣非所謂秉山川之靈闢天地之運者乎至大戊申公爲翰林承旨予忝末屬始拜公于翰林是年終詔修成宗皇帝實錄日侍公筆硯間遂得手鈔公文數十篇玩誦日夜不置其後實錄成進方將求公全帙編次而公謁告南來矣曩得寧國所刊本讀之旣非全帙譌舛尤多每爲悵然也至順壬申公之門人翰林待制劉公時中始以公之全集自中書移命江浙以郡縣贍學餘錢命工鐫木大惠後學予時承

乏提舉江浙儒學因獲董領其事私竊欣幸乃與錢塘學者葉景修重加校讎分門別類得古賦三篇詩二百二十二篇序三十八篇記五十三篇碑銘墓誌一百四十篇制誥五十八篇傳二篇贊十五篇說十一篇祝冊十篇雜著十三篇樂府百二十四篇總六百八十九篇案牧庵集今無全本卽此序及年譜猶可見其各體文之原數凡五十卷竊惟公之文雄深雅贍世罕有知焉譬之太羹玄酒食而無味然足以饗天鳴呼草玄者之有望于後世之子雲也宜哉至順昭陽作噩之歲季春之閏儒林郎江浙等處儒學提舉鄱陽吳善序

原序

皇元宅天下百許年倡明古文纔牧庵姚公一人而已
蓋常人之文多剽陳襲故窘趣弗克振拔惟公才驅氣
駕縱橫開闢紀律惟意其大畧如古勁將率市人戰彼
雖素不我習一號令之則鼓行六合所向風從無敵不
北雖路絕海嶽亦莫不迎統而開猶度平衍視彼選兵
而陣擇地而途纔一再敵輒衰焉且老者相萬矣走年
二十四見公于京師時公直學士院每有所述于醢酏
後岸然暇坐詞致砢隱書者或不能供章成則雄剛古
邃讀者或不能句尤能約要于繁出奇于腐江海駢而
蛟龍拏風霆薄而元氣溢森乎其芒寒皜乎其輝煜一
時名勝靡不鰓鰓焉自闕所有伏避其路而將相鼎族
輦金篋幣託銘先世勲德者路謂門趨如水赴壑厥問
之崇學者仰之山斗矣每往來江湖間賸饒宴勞月無
虛朝二千石趨翼下風吟嘯自若巷陌觀者謂君神仙
人嘗謂唐三百年其文爲世所珍者李邕韓愈二人或
所競若市或酬金初門最其凡論之公蓋兼有至其外
榮達喜施與宏逸高朗中表惟一年愈艾而氣節愈隆

顧有前人所未備者然則公之奇侔瑰異者獨文乎哉
公沒之十一年當泰定改元江西省臣求所述于家凡
如千篇將板行世郎中賈煥華甫走書濟南以文序請
竊惟韓昌黎文李漢氏序歐陽公文蘇軾氏序公與二
子代雖不同要皆間氣所鍾斯文宗匠振古之人豪也
走何人敢於焉置喙辭不獲因紀平昔所嘗得諸心目
者姑副所懇公諱燧字端甫仕至翰林學士承旨榮祿
大夫集賢大學士太子賓客牧庵其自號云濟南張養
浩撰

牧庵集

武英殿聚珍版

提要

臣等謹案牧庵集三十六卷元姚燧撰燧字端甫

號牧庵河南人姚樞從子也

集元史無樞樞爲柳城人元無柳城當是樞

志載之文著其孤賈耳

初以薦爲秦王府文學後歷官至翰林學士承旨集賢大學士謚曰文事迹具元史本

傳燧雖受學於許衡而文章則過衡遠甚張養浩

作是集序稱其才驅氣駕縱橫開闢紀律惟意如

古勁將率市人戰鼓行六合無敵不北柳貫作燧

謚議稱其典冊之雅奧詔令之深醇挾去浮靡一

返古轍而銘誌箴誦雄偉允潔家傳人頌莫得而

掩雖不免同時推獎之詞然宋濂撰元史稱其文

閎肆該治豪而不宕剛而不厲春容盛大西漢

風宋末弊習爲之一變

國初黃宗義選明文其序亦云唐之韓柳宋之歐曾

金之元好問元之虞集姚燧其文皆非有明一代

作者所能及則皆異代論定其語如出一轍燧之

文品亦可概見矣其集久佚不傳明文淵閣書目

有牧庵集二十冊而諸家著錄皆未之及劉昌韓

中州文表所選燧詩較元文類僅多數首文則無

出文類之外者昌跋稱牧庵集五十卷閩松江士

人家有刻本南北奔走竟莫能致今所得乃錄本

多殘缺視刻本僅十之二黃宗羲序天一閣書目

云嘗聞胡震亨有牧庵集後求之不得蓋已久佚

惟承樂大典所收頗夥校以劉致年譜中所載文

目雖少十之二三而較之文類所選則多十之五

六矣詩詞更多出諸家選本之外謹排比編次釐

爲三十六卷以存其概劉致年譜一卷亦附於後

集中諸體皆工而碑誌諸篇敘述詳贍尤多足補

元史之闕又不僅以詞采重焉

牧庵集目錄

卷一

祝冊三首

詔制二十八首

卷二

詔制二十六首

卷三

序十四首

卷四

序十一首

卷五

記四首

卷六

記八首

卷七

記五首

卷八

記七首

十九

記十首

卷十

廟碑四首

卷十一

、廟碑三首

卷十二

廟碑四首

卷十三

神道碑三首

卷十四

神道碑三首

卷十五

神道碑二首

卷十六

神道碑四首

卷十七

神道碑五首

卷十八

神道碑四首

卷十九

神道碑三首

卷二十

神道碑四首

卷二十一

神道碑四首

卷二十二

神道碑三首

卷二十三

神道碑四首

卷二十四

神道碑五首

卷二十五

墳道碑三首

神道碣四首

卷二十六

先德碑一首

先德碣一首

墓碣四首

卷二十七

阡表四首

阡碣一首

卷二十八

墓誌銘六首

卷二十九

墓誌銘七首

卷三十

傳一首

行狀一首

卷三十一

經義一首

名字說三首

題跋六首

銘六首

贊二首

卷三十二

賦一首

五言古詩三十八首

卷三十三

七言古詩十九首

卷三十四

五言律詩四首

五言排律詩一首

七言律詩三十五首

七言絕句四十八首

卷三十五

詩餘二十八首

卷三十六

詩餘十九首

附錄

年譜

牧庵集卷一

元 姚 燧 撰

祝冊

加謚祖宗告祀南郊祝文

維至大二年蒼龍已酉冬十月庚戌朔十有九日戊辰
嗣皇帝臣某臣賴上天之祐祖宗之靈得以眇末之躬
託于億兆京垓臣民之上持盈守成凡今三年身至太
廟兩簪禪將非獨于親立愛臣家庶亦孝治可先天下
而祠官讀祝于太祖室惟曰聖武皇帝睿宗室亦惟曰
景襄皇帝至世祖室則曰聖德神功文武皇帝名譽之
美垂無窮者多及六言顧於創業之祖垂統之宗開我
後人繼繼承承億萬維年者稱述成功盛德有所未盡
心實歆然謹遣太尉尚書右丞相臣某謹致牲玉燔柴
泰壇昭告昊天上帝加謚太祖曰法天啟運聖武皇帝
睿宗曰仁聖景襄皇帝伏惟圖靈居高聽卑灼臣微忱
敕我祖宗歆此嘉謚臣不勝感激戰栗之至

皇帝尊號玉冊文

維至大二年正月乙酉朔越七日辛卯皇太子中書令

樞密使臣某謹率中外文武百僚頓首頓首謹言昔我
世祖既平炎趙質之於書幅員廣長振古無倫覆轡之
下八紘萬國莫敢不庭何獨一王西北岸然憑道阻修
方命正朔德綏之而不學威董之而不讐夫豈不能聲
罪致罰深入其地終以聖人親其宗親包荒有年成宗
繼序憤久驚頑天鑒昭明於裕皇孫獨異陛下授以太
祖皇帝信寶撫軍漠北是固以張足付神器之本時未
及冠承命卽行其視萬里莽聞寒冽之鄉不遠不難如
堂適庭至則獎厲諸軍修明法志節拔果毅均苦分勞
解衣煖寒推食飫飢洗沱沱土氣日作審算伐謀待
寇歲至奪人以先身踐戎行霆馳電擊大北其羣虛已
不矜日慎一日始終十年不狃屢勝在彼不懲悉銳來
加當以選鋒伺間出奇盡襲輜重彷徨無歸度不能軍
羣倪羣鼎降口百萬致茲牧宰平四十年未靖之梗成
兩祖宗未究之志天下之人聞其風聲思親天光者順
願翹翹九圍一心握是乾符歸正宸極弛武事之夙習
治新化以文治立愛自親曾未旬浹上尊太后問安以
時下建儲宮庶政是先又舉列聖未遑之典欽崇元祀

玉璽黃流薦裸太室還蹕龍興徘徊太祖龍旂九旂勳
金于斯壁基帝業爲城中都又以孔子垂範百王將二
千年而顯謚未稱加大成子至聖文宣王上立勞于軍
與凡庭臣悉大賚之間歲不登既賑既恤虞施未博民
罹罪罟再肆大宥至德難名赫赫巍巍惟天爲大掛一
漏萬井觀如斯求可盡臣下歸美報上者惟是徽稱謹
奉玉冊玉寶上尊號曰統天繼聖欽文英武大章孝皇
帝欽惟陛下立心天地立極生民茂對鴻名于億萬年

皇太后尊號玉冊文

維至大三年歲次庚戌冬十月甲辰朔越五日戊申嗣
皇帝臣某臣伏思顯考順宗未臨海寓眇眇小子託其
遺體顧踐丕基惟事聖母養以天下何無不有何欲不
臻而隆名盛典辭未見俞非臣所以表微忱酬大德也
欽惟皇太后陛下貞順而齊肅淵哲而剛明居常處變
憂威異施臣在先朝受詔漠北往撫諸軍可謂遠役以
義割恩縱災其行迨輒河陽承懷彌切親至五臺禱于
佛乘尚憑陰陽早遂振旅殿閣是崇靈貺用昭旋聞國
恤併日馳赴邪謀方興授冊儲皇曾不再日掃清宮掖

特臣以來昇付神器自非審斷安救內訌往歲鑾輅再
輒五臺淨供大修以畢夙願極心爲臣天壽地持日居
月諸其大其明非言所喻詩之言曰母氏劬勞推之眇
末咻仁煦慈百倍爲艱圖以報塞惟崇顯號者強而名
之庶幾聖德昭明天下是用類于上帝禋于太室奉玉
冊玉寶上尊號曰儀天興聖慈仁昭懿壽元皇太后欽
惟皇太后陛下慶蹟莫上之尊福衍無疆之歷非躬是
保慈訓是承

詔制

行銅錢詔

至大二
年十月

錢幣之法其來遠矣三代以降沿革不常世祖皇帝建
元之初頒行交鈔以權民用已有錢幣兼行之意蓋錢
以權物鈔以權錢子母相資信而有證今鈔法一新期
於公私兩利重惟經久之計必復鼓鑄之規

至大三年十月敕

朕自嗣守丕基致孝太室奉上玉冊寶加諡太祖爲法
天啓運聖武皇帝光獻翼聖皇后睿宗仁孝景襄皇帝
顯懿莊聖皇后世祖聖德神功文武皇帝昭睿順聖皇

后裕宗文惠明孝皇帝徽仁裕聖皇后順宗昭聖衍孝
皇帝成宗欽明廣孝皇帝貞慈靜懿皇后于斯之時宜
降德音誣告天下猶恐敷赦或賊良民今因西北叛王
不受正朔五十餘年其子齊博爾蓋愆前人盡數卻衆
歸命闕庭乃庫庫齊謀爲非覬未忍置理刑以輕典與
夫崇建大利上爲列聖報德冥冥下爲生民祈福昭昭
者亦旣成功皆我聖母之德之致已於此月五日奉玉
冊玉寶上尊號曰儀天興聖慈仁昭懿壽元皇太后屬
大慶禮成宜敷渙號以新民聽於戲凡在有司一乃心
力以輔予治期底隆平

卽位詔
至大四
年三月

惟昔先帝事皇太后撫朕眇躬孝友天至由朕同託順
考遺體重以母弟之嫡加有削平內難之功于其踐阼
曾未踰月授以皇太子寶領中書令樞密使百揆機務
聽所總裁于今五年先帝奄棄天下勲戚元老咸謂大
寶之繩旣有成命非與前聖賓天而始徵集宗親議所
宜立者比當稽周漢晉唐故事卽正宸極朕以國恤方
新誠有未忍是用經時今則上奉皇太后勉進之命下

御諸王勸戴之勤三月十八日于大都大明殿卽皇帝
位凡尙書省誤國之臣先已伏誅同惡之徒亦已放殛
百司庶政悉歸中書命丞相鐵木迭兒平章政事完澤
李道復等從新極治其可爲今法程拯民急者具如左
方於戲凡爾有官君子皆古所謂治天職食天祿者宜
一心力欽乃攸司無替朕命

左丞許衡贈官制

天非繼聖學之墜緒則不生命世之大才國欲興王道
以比隆肆用爲烝民之先覺何物故之已久尙人思之
未忘故資善大夫中書左丞集賢大學士兼國子祭酒
兼領太史院事許衡玉裕而金相準平而繩直出處則
惟義所在言動亦以禮自持休休焉有容屬屬乎其敬
人能弘道惟朝聞夕死之是期我欲至仁匪晝誦夜思
而不得行已似秋霜烈日化人如時雨和風來席下之
振衣滿戶外者列屢達簡在帝心者率多承弼窮固守
師說者不失善良鶴鳴九臯而聲聞於高鳳翔千仞必
德輝乃下爰立相以竟君彝民之志所告上皆伊訓說
命之言丹戾斥姦少不遵雷霆之軋擊青臺治歷本于

筭日月而送迎繇理窮而智益明隨任使而職斯舉今
既亡矣誰其嗣之於戲在爾身有垂沒世之名于朕心
有失同時之恨雖成廟納書以命謚固已振木鐸之高
風而功臣胙土則未加用申錫寶章于下地光靈如在
寵數其承可贈正學垂憲佐運功臣太傅開府儀同三
司追封魏國公仍謚文正

中書右丞相塔喇台追封淇陽王制

出入帷幄在人十能而已則千計謀廟堂爲相一年而
疾居半竟邦家之殄瘁宜王禮以追崇具官某維昔開
國之遺苗乃今太師之元嗣由爾世胄爲我親臣事世
祖至今也凡三朝職食官而久者非一日灼其廉明而
忠亮與夫恭遜而溫文眷茲中書出庶政之原居以右
相絕百僚之席使加中政機總六軍善調護而長宮師
監樂修以成國史如此重責皆所裕爲一德可以寬鄙
夫片言奚止簡繁務思過榮之可懼視倖利以不貪同
綰銀艾者十人爾先辭免其太尉均受錫田以萬畝爾
獨還致于司空觀父子之並相一門求聖賢與尙友千
古改爲改作緇衣何賴乎武桓拜後拜前赤烏未慙於

周魯方歌功於清廟倏委輓於玄閭豈意少者歿而老
者存益信神難明而理難測憐乃公獨傷於漠北普爾
後均胙乎淇陽於戲何但上下牀盡餘子可束之高閣
如失左右手慨正人不作於下泉咨爾靈明歆朕休命
可特贈封謚爲懷忠昭德佐治功臣開府儀同三司太
師上柱國淇陽惠穆王

索隆噶台贈營國威翼公制

朕聞康王之入端門其從呂伋文帝之來代邸亦拜宋
昌固知非心符之臣不以付爪牙之士某官某任足以
致遠斷可爲克剛以世祖見萬里之明于親臣極一時
之選愛其春秋之方盛責以夙夜之惟勤昉試于中俾
執干而衛闕旋出之外與受鉞以平淮召移全軍往追
叛威既誓捐軀之許敢辭奔命之勞何以報之所未聞
者杯盂聚瑤以陳玉賓虞秩秩之初筵鞍勒盤陀以校
金人避駭駭之上驪榮生如此哀死可無庸建爾於上
公卽家爲國廣綬予之孝子與親共尊靈而有知歆是
殊渥

楊恭懿贈弘農郡文康公制

聲相應而氣相求允謂風流之二老生有封而死有贈式昭恩數於九原其肩隨許魏國者誰歟而目爲秦君子則公也故集賢館學士太中大夫兼太史院事楊恭懿抱經濟學恥章句儒守四書爲入道之階梯持一敬爲立身之根柢其辨析則江河之莫禦其操履則山嶽而不移信蠶有績而蟹有匡化三輔喪親之自致無鵠生突而祥生與視萬鍾於我亦何加所師授者皆成德達才有朋來者必忠告善道非商山之幣不起而宣室之席始前由道德禮樂刑政蘊之胸故歷象日月星辰指諸掌明朝花謝數之精者堯夫何處星來君其問諸李邵是皆非常人所企及宜其爲吾道之指歸今也則亡誰其能及於戲天下之事日銷月鑠惟餘不朽之聲名關西之風山高水長尚爾克開其苗裔英靈不昧異渥其承

劉秉忠贈趙國文正公制

運際風雲不可謂生時之無益名垂宇宙斯克當沒世而不忘將求若人展無與匹開府儀同三司太傅上柱國趙國文正公某淵深而智山靜其仁方見龍之在田

嘗追天之未雨貫百王之一其道于聖學以開明敷五典之三爲綱華人紀之修叙身本斯立政條用張頌祿于陝之東西屯田于淮之南北從征六詔與越三江贊神武不殺之仁治民心好生之德咸嘉謨之入告至大業之佐成是以楓宸之念功俾于蘭省而總政屬王旅軍壘之迎勞隨王與文軌之混同而獨身不及見之亦衆心所甚惜者至元之贈進保爲傳大德之謚以正易真在先朝之恤雖曰已隆自今日而思猶答未盡何功臣之見後復太師之未加豈朕待爲于爾其告於戲非登朝霞以棲其魄從往聖陟降于帝庭則抱明月而遊乎方訪裔孫徘徊於神道章追刻密恩重書棺

王思廉之考贈恒山郡正獻公制

陰雨膏之由太山出雲于膚寸滄浪清者乃嶠冢導滌之濫觴卽物理已然而求見世德自微而著某官某之考炳稟姿溫粹泣事敏恭知惟讀其父書示不忘乎家學方覓在野之並逐猶鴻集澤之未安茲仕其時立勞于國爲令雖囿乎百里施治可型之四方收蔽朴之威以求得情乎獄拒權筭之策以堙興利之源得古人用

其一緩其二之心故取民也有制非後世朝而三暮而四之術其得民也以仁逮夫中統之建元治最十路于宣幕不享其身者淵停而雲渚以昌爾後者天施而地生由服勤祖宗之兩朝俾進秩丞疑於二品於戲推子以及其父不子大郡以疏封知臣宜莫如君曷報舊人之共政

妣贈恒山郡夫人制

婦人之爵視夫若子之貴賤而爲崇卑夫貴而子卑官始大而終成寥寥無聞夫卑官子致位將相故人生榮而死哀之雖勢之必至營魄有知寵數欽若然猶視媿德娠賢之何如某官某之妣武氏其夫雖未至于顯庸而盡瘁州縣惟恐利澤不加于民而聲名日延可謂媿德迨其子壯美知世祖典瑞於中大官再上食必以見及而不後之隨時煥寒歲賜之服而克翼翼小心未嘗見貶于聖訓者兩朝四紀自脊密而進丞疑而館閣于月旦評者推傳相爲稱首謝事而去晚有宮賓之招亦以老辭凡若此者皆出斷機之教可謂娠賢汝武氏兼有之斯具美矣

散周氏塔塔爾贈蜀國武定公制

朕惟他臣之家由其子孫位登將相故褒命其親上及三代皆有國之禮經崇大臣也具官某惟爾家則不然尚論其世雖源遠未分而同出於天潢矧其考博囉岱呼爾罕有功太祖立國之初及爾之身承是勲勞由帝憲宗御器械出乘旄鉞疆理四川西起劍閣而東盡夔門勁騎一蹂而宋人去平土城郭壁山柵水假息歲月不敢出犯其鋒非獨爲國震耀武威張今混一之本使爾子孫席是以興接武爲將續乃舊服亦爲爾家邁德之祖求他臣家由于孫貴以褒命者語豈同日哉於戲可嘉也已

考贈蔡國武穆公制

知臣宜莫如君凡曰有勞而必報推子以及其父父雖未仕而亦封實原始之教忠特飭終而追恤具官之考福寬初由力穡旋致豐貲嘗倒囷以周窮率裂券而免負俾鄉鄰傾心而懷惠善頌其家鍾光嶽全氣以生賢元勲子國祿及養以五鼎年幾躋於九齡於戲世皆流澤于目前潢汙隨涸爾獨揚名于身後華衰何如尚其

光靈服此茂渥

妣贈牛氏蔡國夫人制

四民之中士無恒產工利器用商還無而皆資衣食于農斯古有國官人必于力田由善務本故生子夢而向義多爲鉅臣具官某之妣牛氏由生令子當今季朝砧夕鼎之時獨完其宗來歸吾元以開勲爲顯諸侯而與其夫安享祿養以終循是褒章宜及所自

某官之考贈韓國敬穆公制

惟勤夙夜莫踰誓御之臣何物暑寒敢曰休安其室屬世皇之遘豫召路寢以入居方憑几之道揚俄綴衣之庭出恨不攀龍髯而俱上悼其附鳳翼之不終從事孫曾如臨父母最是三朝之知遇加於百辟之等威何以報之先德用章庶其逝者下泉無憾某官某之考秉氣通正爲才裕優當僉其國之都議司聞振下民之餓羸者損布爲端之三百與米爲斛之一千百銀桶之副諸五金品之亞者初匪干民之譽如家量貸而公量收實以推君之仁示朝信道而工信度種德若此生賢則宜求臣鄰之顯親至師垣之極爵於戲高車駟馬維不覲

于生前袞冕桓圭亦足華于身後光靈不泯明命用歆

妣賈氏贈韓國太夫人制

夫封婦命雖君禮臣之所同子貴母榮以古驗今而尤異欲彰孝之潔白可後典其焚黃某官某之妣賈氏賦質柔嘉爲心恭懿出移天北山之李宜爾室家求奉祀南潤之蘋蘩其宗廟匪眞善閭門之主饋又佐割幣庫以振饑如聞壺外之嫺皆曰女中之士篤生哲嗣實爲親臣於戲由雛引以鳳飛故得飾終於下土信賢匡而顯績可以興孝于他門

妻韋氏封韓國夫人制

惟爾之家世緒絕遠自漢儒賢及玄成父子繼爲丞相傳魯論於灰燼之末實開道統之源至唐其族尤盛女爲后而男尚主與仙李蟠根相終始歷數百年其遺澤餘波及爾身者與袞衣赤帶者匹最爲近象于魁三而朱幘翟第以朝何異去天之尺五出門輝耀行路咨嗟可謂極命婦之榮而未正小君之號不其闢敷爲降恩綸

中書左丞相阿都台追封順昌郡王制

臣爲委質勞於同軌之間國以念功恩以襍衣之後雖飾終其時有所未及在追恤今日烏可或遺愛寵幽褒用昭異數具官某力齊蘇貢量與川通託開國將種之苞根挺明堂工師之大木受任闔外買勇籌邊爲憲宗入蜀之前鋒因殘百粵非世祖投江以尺筆不返三苗報効之私寤寐不置百其身以奚恤一乃心之是期會師征險順而貞得夬剛決柔之兆考版圖之幅裂乘旄鉞以鼓行將訓尊號于偏方必使義聲以先路勢垂破竹名正苞茅有不待陣風蛇之蟠而已飛塵星期之捷如震如怒衽金革北方之強于理于疆蓋江漢南國之紀羣黎壺漿而崩角幼主席橐以泥頭瘁事非伊成功能爾凡十年爲丞于行省奄一旦違世於先朝白雲香歸于青山清風空遺于黃閣像未麟臺之貌服先龍宸之升旣進師垣又建王國俾大書于神路過者式焉示絕等于臣鄰忠則勸矣尚膺茂渥少慰營魂

妻扎拉爾氏追贈順昌郡夫人制

大帝立極之十五年嘗曰昔我太祖戡定中夏日不暇給由天未厭朱德帝制偏方命將出師一家天下今惟

其時曾不三年墟其廟社雖曰審算萬舉萬全亦大臣奉辭宣力死職忘身有以致茲厥功茂哉用是追崇故光祿大夫江西等處行中書省左丞相阿都台爲推忠翼運功臣開府儀同三司太師上柱國順昌郡武敏王其故妻扎拉爾氏在父母家幽閑而禮其移天也淑慎有聞所可盡傷在不壽考以語婉德不及夫丞相建希世之功以語娠賢不得食子大夫科官邪之祿非貴玄壤曷慰貞魂

妻哈達奇氏封順昌郡王太夫人制

漢祖王吳芮於長沙郡史豈及其家爲晉武君祐妻以萬歲鄉夫則未嘗王也求能兼者伊何人斯非爲臣利用行師有饒水建高屋之功則其婦大疏封爵無女蘿施長松之好具官某妻姆于華望續我元勳貞順範乎閨門恭儉化其姻里問安與聖錫宴大明導必中貴人以前坐則外命婦之上寵莫宜于象服光何賴乎魚軒皎日穴同天豈私從其死矢高風物表人則爭仰其生榮與爾貽謀服我休命

張弘範贈齊國忠武公制